

**TULAFONO TAU FAAOFI O LE FONO A LE
AU TUSITALA MA LE AU FAASALALAU 2014**

SAMOA

Faamatalaga e Faamalamalama ai

Faatomuaga

Ua faavaeina i le Tulafono Tau Faaofi le Fono a le Au Tusitala ma le Au Faasalalau ma le Sosaiete a le Au Tusitala a Samoa (JAWS) ina ia i ai so latou sao mo le atinae, faaaogāina ma le faamamaluina o se tulafono laitiiti o le faatinoga o auaunaga e faasino i le vaega faasalalau o mea e tutupu, ma faalauiloa ai tomā faapitoa tau tusitala, ma mo faamoemoega e fesootai i ai.

Fuaiupu:

**VAEGA 1
FAATOMUAGA**

Fuaiupu 1: - ua taua ai e faapea afai e pasia lenei Tulafono, o le a taua loa o le Tulafono o le Fono a le Au Tusitala ma le Au Faasalalau 2014, ma o le a amata faamamaluina i le aso e tuuina i ai le maliega a Le Ao o le Malo.

Fuaiupu 2: - ua aiaia ai mo le faamatalaina o fuaitau o lo o faaaogāina i totonu o le Tulafono Tau Faaofi.

Fuaiupu 3: - ua taua ai e faapea o lenei Tulafono e noatia ai le Malo.

Fuaiupu 4: - ua aiaia ai mo le faamoemoe o le Tulafono Tau Faaofi lea e uunaia ai o tomā faapitoa ma le tulaga faatuatuaina o le auaunaga tau faasalalau. O lenei fuaiupu ua faamatala atili ai e faapea o le Tulafono Tau Faaofi e tataua ona faaaogā, faatinoina ma faamalosiā i se faiga e faamamaluina ai atoatoa o tu ma aganuu a Samoa ma aga tausili i nuu ma afioaga.

Fuaiupu 5: - ua aiaia ai e faapea, e faagaioia le Tulafono Tau Faaofi e faaopoopo atu i isi tulafono, e pei o so o se manaoga po o le tulafono laitiiti o le faatinoga o auaunaga o lo o faaaogāina i le Tulafono o Faasalalau 2010. O lo o taua foi i lenei fuaiupu e faapea, e tumau le aloaia o le Tulafono Tau Faaofi lenei i luga o so o se isi lava tulafono, pe afai e tulai mai so o se faaletonu, ma e le o i ai se tulaga i totonu o le Tulafono Tau Faaofi, e aafia

ai le Tulafono o le Pulega o Ata Tifaga 1978 po o malosiaga o le Komiti Faatino o le Pulega o Ata Tifaga, ua aiaia i lalo o lea Tulafono.

VAEGA 2

FONO A LE AU TUSITALA MA LE AU FAASALALAU

- Fuaiupu 6:** - ua faavaeina ai ma aiaia le tofia ma le faatulagaina o sui o le Fono a le Au Tusitala ma le Au Faasalalau, tofiga po o sui ma le tofiaina o le Sui Taitaifono. Ua faapea foi ona aiaia i lenei fuaiupu, malosiaga o le Komiti o Pulega e faasino i le tofiaina o sui auai o le Fono.
- Fuaiupu 7:** - ua aiaia ai le vaitaimi o le tofi faatasi ai ma totogi o sui auai o le Fono.
- Fuaiupu 8:** - ua aiaia ai e faapea e ao i so o se sui auai o le Fono ona faailoa atu so o se aia i so o se mataupu e iloiloia e le Fono. So o se tagata o ia lea ua solia lenei fuaiupu, e mafai ona faamutaina lona tofi e le Fono ma e lē toe agavaa mo le toe tofiaina.
- Fuaiupu 9:** - ua aiaia ai e faapea e ao ona manaomia faaiuga ma pepa aloaia uma a le Fono ina ia faia i se faiga tusitusia, ma e sainia e so o se tagata po o tagata o lo o galue i lalo o faatonuga lautele po o faatonuga faapitoa a le Fono.
- Fuaiupu 10:** - ua tuuina atu ai le malosiaga i le Komiti o Pulega ina ia tofia ni komiti e faamatuu atu i ai galuega tauave a le Fono, ma i le faia ai o ia tofiga, e mafai e le Komiti o Pulega ona faamatuu atu malosiaga o le Fono, i ia komiti.

VAEGA 3

PULEGA MA TUPE

- Fuaiupu 11:** - ua aiaia ai mo le afaigaluega a le Fono ma noatia ai le Sosaiete ina ia faamautinoa o lo o mautu tapenaga e faagaoioia ai le Fono.
- Fuaiupu 12:** - ua aiaia ai mo tupe a le Sosaiete e aofia ai tupe e faatatauina e le Malo.

VAEGA 4
TULAFONO LAITIITI O LE FAATINOGA O AUAUNAGA

- Fuaiupu 13:** - ua aiaia ai e faapea e mafai e le Sosaiete ona atiae, faamaonia, faaaogāina ma faamamaluina le Tulafono Laitiiti o le Faatinoga o Auaunaga, lea e mafai ona aofia ai mataupu e talafeagai ma le faasalalauina, lomina faasalalau, lipotiina po o le tuuina atu o tala e ala i le vaega faasalalau.
- Fuaiupu 14:** - ua aiaia ai mo le faaaogāina o le Tulafono ma le Tulafono Laitiiti o le Faatinoga o Auaunaga i sui auai uma o le au faasalalau.
- Fuaiupu 15:** - ua tuuina atu ai le malosiaga i le Sosaiete, e tuuina atu ai faatonuga e faaopoopo atu i po o le faamanino ai o so o se mataupu e faasino i le Tulafono Laitiiti o le Faatinoga o Auaunaga.

VAEGA 5
TAUALUMAGA O FAASEA

Vaevaega 1 - Faia o Faasea

- Fuaiupu 16:** - ua aiaia ai mo le faamatalaina o fuaitau o lo o faaaogāina mo le Vaega 5.
- Fuaiupu 17:** - ua aiaia ai mo i latou e mafai ona faia ni faasea mo le solia ai o le Tulafono Laitiiti o le Faatinoga o Auaunaga.
- Fuaiupu 18:** - ua aiaia ai mo le faagasologa o le tagofiaina o faasea e sui o le vaega faasalalau, o i latou ia e noatia i le faasea.
- Fuaiupu 19:** - ua aiaia ai mo faasea e ao ona tuuina atu i le Fono.
- Fuaiupu 20:** - ua aiaia ai mo manaoga mo le faia ai o faasea.

Vaevaega 2 - Taulumaga o Faasea

- Fuaiupu 21:** - ua aiaia ai mo le tagofiaina o faasea e le Fono, e aofia ai le tofiaina o se komiti e susesueina se faasea ua taulimaina. Ua aiaia ai foi mo taulumaga mo le Fono pe a faia se faaiuga o se faasea.

- Fuaiupu 22:** - ua aiaia ai mo le faasilasilaga ma le faagasologa o faasea.
- Fuaiupu 23:** - ua manaomia ai le Fono ina ia uunaia ma lagolago i faaleleiga i le va o lē ua faasea ma le tagata tetee, seia vagana ai ua manatu le Taitaifono e faapea, e lē taugamalie lea faaleleiga.
- Fuaiupu 24:** - ua faatulaga atu ai mafuaaga mo le faalēaogāina o faasea.
- Fuaiupu 25:** - ua aiaia ai mo faaiuga o faasea e faia e le Fono e aunoa ma le fofogaina.
- Fuaiupu 26:** - ua aiaia ai mo le fofogaina o faasea, e aofia ai aia tatau a le tagata tetee e ao ona fofogaina.

Vaevaega 3 - Faaiuga ma Poloaiiga

- Fuaiupu 27:** - ua aiaia ai mo le faaiuga a le Fono ina ia faia i se faiga tusitusia ma tuuina atu i lē ua faasea ma lē ua tetee ina ia faaavanoa atu mo le silafia e tagata lautele.
- Fuaiupu 28:** - ua aiaia ai mo poloaiiga ia e mafai ona faia e le Fono pe afai ua maua se tagata tetee ua ia solia le Tulafono Laitiiti o le Faatinoga o Auaunaga.
- Fuaiupu 29:** - ua aiaia ai e faapea, e leai se aia tatau e talosaga tetee ai i se faaiuga a le Fono, ae peitai e lē aafia ai le malosiaga o le Faamasinoga Sili, e faia ai se iloiloga faa-faamasinoga o se faaiuga a le Fono.

VAEGA 6
SOSAIETE A LE AU TUSITALA A SAMOA

Vaevaega 1 - Sosaiete

- Fuaiupu 30:** - ua faavaeina ai le Sosaiete a le Au Tusitala a Samoa.
- Fuaiupu 31:** - ua aiaia ai mo galuega tauave ma malosiaga o le Sosaiete.
- Fuaiupu 32:** - ua aiaia ai mo le tulaga faasui o le Sosaiete.
- Fuaiupu 33:** - ua aiaia ai mo faamanuiaga a sui o le Sosaiete.
- Fuaiupu 34:** - ua aiaia ai mo i latou ia e mafai ona faamaonia o latou tulaga aloaia o agavaa e le Sosaiete, e aofia ai a latou faamanuiaga, ina ia faia le faaiuga e le Komiti o Pulega.

Fuaiupu 35: - ua aiaia ai mo tulafono faafoe ia e faaaogā i fonotaga aoao faaletausaga a le Sosaiete.

Vaevaega 2 - Komiti o Pulega

Fuaiupu 36: - ua faavaeina ai le Komiti o Pulega ma vaitaimi i le tofi o sui auai.

Fuaiupu 37: - ua aiaia ai mo malosiaga ma galuega tauave a le Komiti o Pulega.

**VAEGA 7
AIAIGA ESEESE**

Fuaiupu 38: - ua taua ai e faapea, afai ua lē mafai e le Fono ona faatino ana galuega tauave i se tulaga aupito sili ona lelei, e mafai e Le Ao o le Malo ona tofia se Fono lē tumau, i le faia i luga o le fautuaga a le Kapeneta, e faatino galuega tauave a le Fono.

Fuaiupu 39: - ua tuuina atu ai le malosiaga i Le Ao o le Malo, i le faia i luga o le fautuaga a le Kapeneta, e faia ai tulafono faatonutonu mo le faamoemoe o le faamamaluina atoatoa o lenei Tulafono.

Fuaiupu 40: - ua puipuia ai se tagata o ia lea e tauaveina se galuega tauave, malosiaga po o tiute i lalo o lenei Tulafono mai noataga tau le tagata lava ia, mo le faatinoina o galuega tauave, malosiaga po o tiute i le agaga lelei.

Fuaiupu 41: - ua aiaia ai mo teuteuga faatupulaia.

Fuaiupu 42: - ua aiaia ai mo aiaiga tau soloaiga ma aiaiga faasaina.

.....
(Hon TUILAEPa Fatialofa Lupesoliai Aiono Neioti Sailele Malielegaoi)

**PALEMIA MA LE MINISITA MO LE MATAGALUEGA
A LE PALEMIA MA LE KAPENETA**